

Qishloq hayoti

2016 йил Соғлом она ва бола йили

Кишлоқ ҳаёти

O'zbekiston Respublikasi ijtimoiy-iqtisodiy gazetasi

www.qishloqhayoti.uz

2016-YIL 21-YANVAR, PAYSHANBA, 9 (8560)-son

1974-yil 1-yanvardan chiqqan boshlagan
Bahosi kelishilgan narxda.

ЗАМОНАВИЙ ШАРОИТЛАРДА ЯШАШ БАХТИ



Президентимиз раҳнамолигида намунавий лойиҳалар асосида бунёд этилаётган замонавий уй-жойлар қишлоқларимиз қиёфасини тубдан ўзгартириш билан бирга, халқимизга ҳеч кимдан кам бўлмаган турмуш шароитлари яратиш борасида юксак самаралар бермоқда.

2

ШУКРОНАЛИК

НИЯТЛАРИМИЗ ПОК, ЙЎЛЛАРИМИЗ НУРАФШОН

Президентимизнинг мамлакатимизни 2015 йилда ижтимоий-иқтисодий ривожлантириш яқунлари ва 2016 йилга мўлжалланган иқтисодий дастурнинг энг муҳим устувор йўналишларига бағишланган Вазирлар Маҳкамасининг кенгайтирилган мажлисидаги маърузасини катта қизиқиш билан тинглар эканман, кўнглим ғурурга тўлди. Унда келтирилаётган рақамлар, қўлга киритилаётган ютуқларимиз ва, энг муҳими, халқимизнинг турмуш даражасини янада юксалтириш йўлидаги ниҳоятда пишиқ-пухта ўйланган изчил ислохотлар самараси ҳар бир юртдошимизни чексиз қувонтириши табиий, албатта.

Маърузада келтирилганидек, эришяётган барча ютуқларимизнинг асосий омили мамлакатимизда ҳукм сураётган тинчлик, осойишталикдандир. Бугунги таҳликали замонда тинч, осуда юрда яшашнинг ўзи катта бахт эканлигини ҳар биримиз билиб, чуқур ҳис этиб турибмиз. Негаки, неъматларнинг энг яхшиси ҳаловатдир. Ҳаловати бор одамнинг келажакка бўлган ишончи мустаҳкам, қилаётган ишида барака бўлади. Янги-янги марралар сари интилишдан тўхтамайди.

Тадбиркорлик фаолиятимизни бошлаганимизга беш йил бўляпти. Утган вақт

мобайнида биз, тадбиркорлар учун яратилган кенг имкониятлардан унумли фойдаланиб қатор ютуқларни қўлга киритдик. Фаолиятимиз қўламини кенгайтириб бормоқдамиз. Дастлаб, фаолиятимизни тойланган пахта ишлаб чиқаришдан бошлаган бўлсак, ҳозирда ишимизни янада кенгайтирганмиз. Қолиплаган бетон ғишларимиз харидоргир. Чорвачилик ва шу билан бирга, гўшт дўкони фаолиятини йўлга қўйганмиз. Бундан аҳоли мамнун. Шунингдек, 8 сотих ердаги иссиқхонамиздан ҳам яхшигина даромад оляймиз. Унда миллионлар келтираётган лимонлар етиштирилмоқда. Айни пайтда

фирмаимизда 8 киши меҳнат қилаётган бўлса, эндиликда улар сони янада кўпаяди. Сутни қайта ишлашни йўлга қўймоқчи бўлиб турибмиз.

Шу ўринда айтиб ўтишим жоизки, болалиги етимликда, ота-она меҳри нима эканлигини ҳис қила олмай ўсган мендек бир кишининг бугунги кунда ўз фирмаси бор. Бугунги доруламон кунларни, истиқлол бераётган имкониятларни ҳис этар эканман, беихтиёр қалбим шукроналик ҳисси билан тўлади. Яратганга шукр, дейман. Бизга мана шундай узокни кўра билладиган, халқининг дарди билан яшайдиган, тинчликсевар Юртбошини муяссар кўргани учун шукрона келтирмай бўладими?!

Бугун ўзимиз танлаган мустақил тараққиёт йўлимиздан дадил одимлаб боряпмиз. Аҳиллик, ҳамжихатликда кўплаб ютуқларга эришяпмиз. Албатта, ютуқларимиз янада салмоқли бўлади. Негаки, халқимизнинг умидлари эзгу, ниятлари пок.

Муродилла ТОЖИЕВ,
Қашқадарё вилояти Яқкабоғ туманидаги
“Ғозлик мўъжизаси” кўп тармоқли
ишлаб чиқариш фирмаси раҳбари.

САҲИФАЛАРДА

ҲАЙДОВЧИ ВА
ЙЎЛОВЧИЛАР,
қондабузарликлардан
сақланинг!

3

Қушдай харажат
билан туядай
даромад

4

Қиш чилласида
баҳор ҳавоси
бўлса...

5

Ҳар донаси
дармон

8

Қашқадарё вилояти

ОЗОД ЮРТНИНГ ОБОД УЙЛАРИ

ЗАМОНАВИЙ ШАРОИТЛАРДА ЯШАШ БАХТИ

Президентимиз раҳнамолигида намунавий лойиҳалар асосида бунёд этилаётган замонавий уй-жойлар қишлоқларимиз қиёфасини тубдан ўзгартириш билан бирга, халқимизга ҳеч кимдан кам бўлмаган турмуш шароитлари яратиш борасида юксак самаралар бермоқда.

– Мана шу уйга кўчиб ўтдигу замонавий шароитларда яшаш қандай бўлишини англадик, – дейди Шавкат Хўжалов. – Илгари бизга шуниси ҳам бўлаверди, деб юрверган эканмиз-да. Ҳаётга муносабатимиз ўзгарди. Яшашни ўргандик. Бу ердаги шароитлардан аёлимнинг, фарзандларимнинг хурсандлигини кўриб, яйраб кетаман, ёшар-

Қаерда тинчлик-осойишталик қарор топса, ўша жойда файзу барака, тараққиёт ва фаровонлик бўлади.

ТИНЧЛИК – БЕБАҲО НЕЪМАТ

Бугун муқаддас ватанимизда бу борада эришилаётган улкан натижалар дунё ҳамжамияти томонидан кенг эътироф этилаётганидан хабардоримиз. Жумладан, Бирлашган Миллатлар Ташкилоти кўмагида АҚШнинг Колумбия университети томонидан ўтказилган тадқиқотлар асосида эълон қилинган “Бутунжаҳон бахт индекси”да Ўзбекистон 158 та давлат ўртасида 44-погонани, Мустақил Давлатлар Ҳамдўстлиги мамлакатлари орасида биринчи ўринни эгаллагани, Жаҳон иқтисодий форуми томонидан эълон қилинган рейтингда эса иқтисодиёти тез ривожланаётган давлатлар орасида 5-ўринда экани эътироф қилингани бизга ғурур ва ифтихор бағишлайди.

Айни пайтда дунёнинг қатор ҳудудларида давом этаётган ўзаро келишмовчиликлар, жанговар ҳаракатлар барчамиздан доимо огоҳ ва ҳушёр бўлишни тақозо этмоқда. Айниқса, ислом дини ниқоби остида қилинаётган қўпуровчилик ва хунрезликлар қалбларимизни ларзага солмоқда.

Ана шу ғаламис террорчиларнинг асл мақсадларини биллиб-билмай, тушунмай, уларнинг ёлғон ваъдаларига алданиб, фитналарига учиб, хоюҳавас қурбонларига айланиб қолаётган ёшлар ҳақида эшитиб, чин қалбимиздан изтиробга тушаётганимизни таъкидлаш жоиз. Юртбошимиз қайта ва қайта таъкидлаганларидек, дунёнинг у ёки бу чеккасидаги бундай салбий ҳолатларга биздан узоқда экан-ку, деб бефарқ қараб туриб бўлмайди.

Яқинда туманимизнинг Норинка қишлоғидаги маданият ва аҳоли дам олиш марказида тарғибот гуруҳи, туман ва қишлоқ фаоллари иштирокида “Ислом ва ақидапараст оқимлар” мавзусида давра суҳбати ўтказилди. Унда иштирок этган қишлоқ аҳли яна бир қарра ислом динининг асл моҳияти тинчлик, бағрикенглик, меҳр-мурувватлилик, ватанпарварлик, маърифатлилик каби эзгу ғоялардан иборат эканлигини қайд этдилар.

Ҳақиқатан ҳам, жаҳолатга қарши маърифат билан курашмоқ бугун ҳар биримизнинг долзарб вазифамизга айланмоғи керак. Бу борада биз мустақиллигимизни, халқимизнинг осуда ҳаётини ҳар қандай хавф-хатардан асраш учун бор билим ва салоҳиятимизни ишга солишимиз даркор.

Ҳабибулло МАҲМУДОВ,
Наманган вилояти
Норин тумани Марғизор
қишлоғидаги “Аҳмадали”
жомеъ масжиди
имом хатиби.



Буни Қашқадарё вилоятида барпо этилаётган янги массивлар мисолида ҳам кўриш мумкин. Давлатимиз раҳбарининг 2009 йил 3 августдаги “Қишлоқ жойларда уй-жой қурилиши кўламини кенгайтиришга оид кўшимча чора-тадбирлар тўғрисида”ги қарорига мувофиқ, ўтган йилларда вилоятдаги 75 массивда 2 минг 52 шундай уй-жой фойдаланишга топширилди.

Айни пайтда ушбу массивларда 166,8 километр ички йўллар, 380,8 километр ичимлик суви тармоғи барпо этилди. 3 тик қудук, 12 сув минораси, 20 сув сақлаш ҳовузи, 167 сув қудуғи қурилди. 184 километрлик газ қувури тортилди, 89 кучланишли трансформатор ўрнатилди. Замонавий савдо ва маиший хизмат кўрсатиш шохобчалари, ишлаб чиқариш цехлари, бозор ва маҳалла гузарлари аҳолига қатор қулайликлар яратмоқда.

– Намунавий уй-жойлар лойиҳаси жуда пухта режалаштирилган, маиший шароит учун зарур бўладиган барча омиллар кўзда тутилган, – дейди “Элма қурилиш таъмирлаш” масъулияти чекланган жамияти раҳбари Абдуқодир Аҳадов. – Бунёдкорлик ишларида юртимизда ишлаб чиқарилган қурилиш материалларидан кенг фойдаланилмоқда.



Жамшид НОҚОБИЛОВ (ўза) олган суратлар.

Қарши туманидаги “Богобод” қишлоқ фуқаролар йиғинига қарашли Тўқманғит замонавий массиви ҳам йил сайин обод ва кўркем масканга айланмоқда. 2015 йилда ушбу массивда 149 уй-жой барпо этилиб, ўз эгаларига топширилди.

гандай сезаман ўзимни. Мўъжазгина томорқада полиз ва сабзавот маҳсулотлари етиштиряпмиз. Бундай ширин ҳаёт учун Президентимиздан беҳад миннатдоримиз.

Ў. БАРОТОВ,
ЎЗА мухбири.

ОЛИЖАНОБ МАҚСАД ЙЎЛИДАГИ ФАОЛ ФАОЛИЯТ

ЎЗБЕКИСТОН ХАЛҚ ДЕМОКРАТИК ПАРТИЯСИНING ДОИМИЙ УСТУВОР ВАЗИФАСИДИР



Пойтахтимизда Ўзбекистон Халқ демократик партиясининг Олий Мажлис Қонунчилик палатасидаги фракцияси ҳамда партия Марказий Кенгашининг Президентимизнинг мамлакатимизни 2015 йилда ижтимоий-иқтисодий ривожлантириш яқунлари ва 2016 йилга мўлжалланган иқтисодий дастурнинг энг муҳим устувор йўналишларига бағишланган Вазирлар Маҳкамаси мажлисидаги маърузасидан келиб чиқиб, партия олдида турган вазифалар юзасидан қўшма йиғилиши бўлиб ўтди.

Унда Ўзбекистон ХДПнинг Олий Мажлис Қонунчилик палатасидаги фракцияси аъзолари, партия Марказий Кенгаши масъуллари, Қорақалпоғистон Республикаси, Тошкент шаҳри ва вилоятлар Кенгашлари раислари, фаоллар ҳамда ОАВ вакиллари иштирок этди.

Тадбирда таъкидланганидек, Юртбошимиз маърузасида келтириб ўтилган рақам ва маълумотлар кенг жамоатчиликда катта қизиқиш уйғотмоқда. Унда айтилганидек, ўтган 2015 йилда ҳам мамлакатимизда аҳолининг муносиб ҳаёт даражаси ва сифатини таъминлаш, республикамизнинг ривожланган демократик давлатлар қаторидан ўрин эгаллаши йўлида барча соҳаларда изчил ислохотлар амалга оширилди.

2015 йилда юртимизда 980 мингдан ортиқ иш ўрни ташкил қилинган бўлса, шунинг 60 фо-

издан зиёди қишлоқ жойларда яратилди. Касб-хунар коллежларининг 480 мингдан ортиқ битирувчиси иш билан таъминланди. Тижорат банклари томонидан битирувчиларнинг ўз бизнесларини ташкил қилишлари учун 280 миллиард сўмга яқин имтиёзли кредитлар ажратилди. Мазкур йўналишдаги тадбирларнинг изчил давом эттирилиши эса партиянинг ҳаракат дастури билан ҳамроҳандир. Шунингдек, иқтисодиёт ва хизмат кўрсатиш соҳасининг юқори суръатлар билан барқарор ўсиши Ўзбекистон Халқ демократик партияси учун муҳим устувор йўналиш – аҳоли бандлигини таъминлаш, авваламбор, касб-хунар коллежлари ва олий ўқув юртлари битирувчиларини ишга жойлаштириш учун зарур шароитлар яратмоқда.

Аҳоли бандлигини таъминлаш, меҳнатга лаёқатли аҳоли-

нинг муносиб ҳақ тўланадиган иш топишга интилишини қўллаб-қувватлаш, уларнинг ташаббускорлиги ва тадбиркорлигини рағбатлантириш, мустақил ҳаётга кириб келаётган ёшларга, уларнинг ижтимоий келиб чиқилишидан қатъи назар, албатта, биринчи иш ўринларига эга бўлишлари учун адолатли, тенг ва ижтимоий жиҳатдан мақбул шарт-шароитларни яратиш масаласи партия Сайловолди дастурининг муҳим йўналишларидан бири ҳисобланади.

Шунингдек, иштирокчилар томонидан мамлакатимизда соғлиқни сақлаш тизимини тубдан такомиллаштириш, тиббиёт муассасаларидаги шарт-шароитларни янада яхшилаш мақсадида 2015 йилда амалга оширилган ишлар алоҳида эътироф этилди. Бу борада партия ташкилотлари ва депутатлик бирлашмалари томонидан бажа-

рилган ишлар атрофлича таҳлил қилинди.

Таъкидландики, келгусида амалга оширилаётган ислохотлар жараёнида ўтган даврда орттирилган тажриба ва аниқланган камчиликлардан келиб чиқиб, партия ташкилотлари ва депутатлик бирлашмаларининг иштироки янада фаол бўлиши лозим. Зеро, бу партия дастурий мақсадларини ҳаётга татбиқ қилишда ҳал этувчи аҳамиятга эга.

Қолаверса, давлатимиз раҳбарининг маърузасида ижтимоий соҳани ривожлантириш, аҳолининг турмуш даражаси ва сифатини янада ошириш мақсадида 2016 йилда ижтимоий соҳага Давлат бюджети жами харажатларининг 59,1 фоизи йўналтирилиши режалаштирилганлиги қайд этилди. Мазкур маблағларнинг манзиллилигини таъминлаш партия дастури билан бевосита боғлиқ бўлганлиги боис, ушбу масала муҳокамаси ҳам қизгин тарзда кечди.

Тадбир сўнггида Президентимиз маърузасида айтиб ўтилган устувор вазифалардан келиб чиқиб, ўртага ташланган таклифлар асосида партия ташкилотлари ва партия гуруҳларининг фаол иштирокини таъминлаш бўйича зарур чора-тадбирлар белгиланди, тегишли қарор қабул қилинди.

Шодиёр ЙЎЛДОШЕВ,
“Qishloq hayoti” мухбири.

ҲАЙДОВЧИ ВА ЙЎЛОВЧИЛАР, ҚОИДАБУЗАРЛИКЛАРДАН САҚЛАНИНГ!

Рулни бошқараётган ҳайдовчи машинаси тезлигини назорат қилиши, атрофдаги пиёдалар ҳамда бошқа автомобиллар ҳаракатини кузатиб бориши ва яна кўплаб ҳолатларга эътибор қаратиши лозим. Акс ҳолда... Фалокат оёқ остида, дейишади. Бу гап йўловчиларга ҳам тааллуқли.

Фалокатга йўлиқмасликнинг асосий шarti эса доимо йўл ҳаракати қоидаларига риоя қилишдир. Агар бу қоидаларга йўл ҳаракатининг барча иштирокчилари бирдек амал қилса, ноҳуш воқеалар юз бермайди.

Ўзбекистон Республикаси Вазирлар Маҳкамасининг 2015 йил 24 декабрдаги қарорига мувофиқ мамлакатимизда жорий йилнинг 1 мартдан эътиборан янги таҳрирдаги "Йўл ҳаракати қоидалари" амалга киритилади. Хўш, янгиланган қоидалардан кўзланган асосий мақсад нима?

ЭШИТМАДИМ ДЕМАНГЛАР, ЯНГИЛИКЛАР КЎП

Мамлакатимизда йўл-транспорт ҳодисаларининг олдини олишга қаратилаётган алоҳида эътибор фуқароларимиз ҳаёти, соғлигини муҳофаза этиш, уларнинг ҳуқуқ ва манфаатларини ҳимоялашга хизмат қилаётганини таъкидлаш жоиз.

Бугунги кунда йўл-транспорт ҳодисалари туфайли жароҳатланаётган ва ҳалок бўлаётганлар сонининг камайишига эришилаётгани ҳам буни кўрсатиб турибди. Албатта, ҳаракатланиш хавфсизлигини таъминлашда "Йўл ҳаракати қоидалари" самаралидир. Шу сабабли, қоидалар мунтазам равишда, маҳаллий шарт-шароитлардан келиб чиқиб, тўпланган тажриба ва ютуқларни пухта ўзлаштириш асосида такомиллаштириб борилмоқда.

Янги таҳрирдаги "Йўл ҳаракати қоидалари"га 15 та қўшимча, бир қатор ўзгаришлар киритилди. Айрим атама ҳамда тушунчаларнинг таърифи аниқлаштирилди.

Маълумки, ҳозирги кунда йўлларимизда "мотоцикл" деб атамайдиган, аммо айнан ушбу туркумга мансуб бўлган икки, уч ва тўрт гилдиракли механик воситалар – квадроцикллар, скутер ҳамда электроскутерлар кўпайиб бормоқда. Баъзан улар томонидан йўл ҳаракати доирасидаги қоидабузарликлар содир этилаётгани ҳам сир эмас.

Шу сабабли, "мотоцикл" тушунчаси кенгайтирилиб, двигател иш ҳажми 50 куб сантиметрдан юқори, тезлиги соати-га 50 километрдан ортиқ ску-

тер, электроскутер ва квадроцикллар шу туркумга киритилди. Энди мазкур транспорт воситалари мотоцикл сифатида рўйхатга олинади ва уларга давлат рақамлари берилади. Уларнинг ҳайдовчилари эса "А" тоифадаги транспорт воситаларини бошқариш ҳуқуқини берувчи ҳайдовчилик гувоҳномасига эга бўлишлари шарт.

Аввалги "Йўл ҳаракати қоидалари"да баъзи иборалар ўзининг тўлиқ ифодасини топмаган эди. Масалан, "йўл марзаси", яъни йўл ёқаси ибораси шулар жумласидандир. Янги қоидада "йўл марзаси" ҳаракатланиш бўлаги билан бир сатҳда жойлашган бўлиб, ундан 1,1 чизиги билан ажратилган ёки бошқа қоплама ётқизилган, транспорт ҳаракати, тўхташи, тўхтаб туриши учун мўлжалланган йўл элементи, деб белгилаб қўйилди.

Транспорт воситаларида болалар хавфсизлигини таъминлаш ғоят масъулиятли вазифа эканлиги инобатга олинди. "Йўл ҳаракати қоидалари"га "болалар гуруҳини ташкилий ташиш" атамаси киритилди. Унга кўра, саккиз нафар ва ундан ортиқ болани автобусда ташиш ташкилий ташиш эканлиги ҳам белгиланди.

Янги таҳрирдаги "Йўл ҳаракати қоидалари"да алоҳида эътибор қаратилган яна бир янгилик, бу тезликдир. Турар жой массивларида юқори тезлик соати-га 30 километр этиб белгилаб қўйилди. Бундан ташқари, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликларига Давлат йўл ҳаракати хавфсизлиги хизмати билан келиш-



ган ҳолда айрим жойларда баъзи транспорт воситаларига белгиланган тезликни ошириш учун рухсат этиш ваколоти берилди.

ЙЎЛДАН ЎТАЁТГАНДА ТЕЛЕФОНДА ГАПЛАШМАНГ

Мамлакатимизда ахборот-коммуникация технологияларининг жадал ривожланаётганини биргина мобиль алоқа воситаларининг оммалашгани ҳам кўрсатиб турибди. Айни пайтда мобиль телефонларни ёшу кекса – барчанинг қўлида кўриш мумкин. Чунки улардан фойдаланиш ҳар томонлама қулай. Аммо мобиль алоқа воситалари ҳар қандай ҳолатда ҳам ўзини оқлайди, дейиш тўғри эмас. Айтайлик, йўлдан ўтаётганда телефон орқали ким биландир суҳбатлашиш ортиқча эмасми? Суҳбат мавзусига қараб, йўловчининг кайфияти ўзгариши аниқ. Бу эса, ўз навбатида, унинг жисмоний ҳаракатига таъсир кўрсатмай қолмайди.

Шунинг учун энди пиёдалар йўлларда юрганда, ўзлари учун ажратилган жойлардан кесиб ўтаётганда диққатини чалғитувчи нарсалар, жумладан, телефон, планшетдан фойдаланиш, видео кўриш, газета, журнал ва китоб ўқиш тақиқланади.

ЙЎЛИНГИЗ БЕХАТАР БЎЛСИН!

Тасаввур қилинг, кечкурун, айниқса, ёритилмаган кўчаларда транспорт воситалари эгалари муайян сабаблар билан, масалан, носозлик туфайли тўхтаб қолди. Шундай вазиятда, албатта, ҳайдовчи машинасини таъмирлаш учун кабинадан чиқади. Йўлда ўтаётган бошқа транспорт воситалари эса машинасини таъмирлаш билан банд бўлган ҳайдовчини кўрмай қолиши мумкин. Мана шу онда хавfli ҳолат юзга келиш эҳтимоли юқори. Буни эътиборга олиб, янги қоидаларда тунги вақтларда ҳайдовчи зиммасига нур қайтарувчи махсус нимчаларни кийиб олиш мажбурияти юкланди. Энди ҳар бир транспорт воситасида тиббиёт кутичаси, ўт ўчиргич, мажбурий тўхтаганини билдирувчи белги билан бирга нур қайтарувчи махсус нимчалар ҳам бўлиши шарт. Бунинг ҳаракатланиш хавфсизлигини таъминлашда аҳамияти катта.

Соҳага ахборот-коммуникация технологияларининг жадал жорий этилаётгани туфайли сўнгги йилларда йўл ҳаракати доирасидаги қоидабузарликларни автоматик тарзда аниқлаш амалиёти кенг қўлланилмоқда. Шу сабабли, "фото ва

видеофиксация" ибораси йўл ҳаракати қоидаида ўз аксини топиб, маъмурий ҳужжатларда қайд этилмоқда. Ҳозир мазкур янгилик онлайн тизимида иш-ляпти. Бундан ташқари, ҳайдовчиларни огоҳлантириш учун "фото ва видеофиксация" ахборот-ишора белгиси ҳам жорий этилди. Бу йўл ҳаракати иштирокчиларини огоҳлантириш, қоидаларга риоя қилишга ундаши билан аҳамиятлидир.

Эътибор берганмисиз, жамоат транспортда кимдир ҳайдовчи билан суҳбатлашиб қолса, кўпни кўрган нурунийлар унга танбех беришади. Чунки ҳайдовчи чалғиши натижасида нафақат унинг, балки йўловчиларнинг ҳаёти ҳам хавф остида қолишлари мумкин.

Йўл ҳаракати хавфсизлигини таъминлашга эътибор йил сайин кучаяётганидан кўзланган асосий мақсад ҳайдовчию йўловчи – инсонлар тақдирига лоқайд муносабатда бўлмасликдир. Мамлакатимизда барча соҳаларда амалга оширилаётган ислохотлар, жумладан, йўл ҳаракати қоидаларининг изчил такомиллаштирилиётгани ҳам инсон манфаатлари олий қадрият эканидан ёрқин далолатдир.

Сайидодил САЙИДИСЛОМОВ,
"Qishloq hayoti" мухбири.

Наманган Вилояти

СПОРТ МАЙДОНИСИЗ МАҲАЛЛА ЙЎҚ

"Миллионлар ўйини" дея таърифланадиган футболнинг Наманганда ҳам ишқибозлари кўплаб топилади. Бунга вилоятдаги "Навбахор" стадионида бўлиб ўтган барча футбол ўйинларини телевизор орқали кузатган томошабинлар ҳам кўп бора гувоҳи бўлишган, десак асло муболаға бўлмайди.

Айниқса, мустақиллик йилларида юртимизда спорт, хусусан, футболни ривожлантиришга қаратилаётган эътибор ўзининг юксак самараларини бермоқда. Бугун нафақат вилоят марказида, балки чекка туман ҳамда қишлоқ ва маҳаллалардаги ёшлар ҳам спортнинг бу тури билан мунтазам шуғулланиши учун улкан имкониятлар яратилди. Истиклолимизнинг 25 йиллиги нишонланадиган жорий йилда стадион ёки мини футбол майдонига эга бўлмаган маҳаллалар қолмади, ҳисоб.

Футболни ривожлантириш орқали иқтидорли ёшлар сафини янада кенгайтириш борасида Наманганда ҳам кенг кўламли чора-тадбирлар белгиланиб, ҳаётга изчил татбиқ этилмоқда. Айни пайтда вилоятда 744 та ўйингоҳ, кўплаб футбол ва мини футбол майдончаларининг мунтазам фаолият юритаётгани ҳам бунга яққол мисол бўла олади.

Яқинда вилоят ҳокимлигида бўлиб ўтган йиғилишда футболимизнинг истиқболли учун муносиб ворислар тайёрлаш, бу борадаги муаммолар ва ечим-

лар хусусида сўз борди.

Унда вилоят ҳокими, Ўзбекистон Республикаси Олий Мажлиси Сенати аъзоси Хайрулло Бозоров Президентимиз раҳнамолигида мамлакатимизда спортни, хусусан, ўзбек футболни ривожлантириш борасида ёшларга яратиб берилаётган шарт-шароитлар ҳақида сўз юритиб, ёш футболчиларнинг янада яхшироқ ўқишга, юртимиз довуғини дунёга ёядиган машҳур футболчилар бўлиб етишиш йўлида тинмай изланишга ундади.

Йиғилишда ташкилий масалалар ҳам кўриб чиқилди. Қизғин мунозара ва билдирилган таклифлардан сўнг клуб президенти-лигига Наманган шаҳар ҳокими Баҳодир Бекхўжаев, вице-президентлика Олимжон Қосимовларнинг номзоди маъқулланди. Авваллари "Навбахор" таркибида тўп сурган, бир неча йилдан

буён "Бунёдкор" жамоасида ўйнаган, кейинчалик мураббий бўлиб фаолият олиб борган Рашид Ғофуров бош мураббий вазифасига таклиф этилди.

Соғлом она ва бола йили вилоятдаги футболга ихтисослашган мактаб ва интернат мактаблари тарбияланувчилари учун унутилмас воқеаларга бой бўлмоқда. Улар Ўзбекистон миллий терма жамоаси ва "Краснодар" (Россия) клуби аъзоси Одижон Аҳмедов билан учрашувда иштирок этди.

Шу куни футболчи Одижон Аҳмедов иштирокчиларнинг саволларига жавоб қайтарди. У замонавий услубда қайта таъмирланган, барча шароитларга эга бўлган "Навбахор" ўйингоҳида ёш футболчиларга мастер класс ўтказди.

Равшанбек МИРЗОЛИМОВ,
"Qishloq hayoti" мухбири.

Фарғона Вилояти

ҚУШДАЙ ХАРАЖАТ БИЛАН ТУЯҚДАЙ ДАРОМАД

Фарғона вилоятида аҳолининг яқка тартибда ёки жамоа бўлиб тадбиркорлик билан шуғулланиши тобора кенг қулоч ёймоқда. Шаҳар ва туманларда ким нимага қизиқса, қандай тадбиркорлик субъектини ташкил этиб, фаолият кўрсатишни истаса, унга барча шароитлар яратиб берилмоқда, банклар томонидан ўз вақтида кредит маблағлари ажратилмоқда. Натижада тадбиркорлар ўз йўналиши бўйича қатор ютуқларга эришмоқдалар.

Риштон тумани Боғистон қишлоғида ташкил этилган «STRAUS FARM» Ўзбекистон — Буюк Британия қўшма корхонасида маҳаллий шароитда туяқуш боқиш йўлга қўйилди.



МАЪЛУМОТ

Ўтган асрнинг бошларида европалик сайёҳлар Африка ва Австралия қитъаларидан туяқуш тухумини кўпайтириш мақсадида ватанларига олиб келадилар. Олиб келинган тухумларнинг фақатгина 22 фоиздан жўжа очиб чиқади. Қизиғи шундаки, улардан 16 фоизи Африка туяқушларининг жўжаси бўлди. Чунки Африка туяқушларининг нафақат жўжалари, балки тухумлари ҳам иссиқсувққа чидамли бўлади. Уларнинг мазали гўшти ўтган асрда ва ҳозир ҳам тансиқ таомлардан бири бўлиб келмоқда.

яқин ерда ўтлоқлар яратилди. Махсус бинолар қурилиши яқунланиш арафасида.

Корхона жамоаси туяқушлардан катта даромад олишни кўзлапти. Бу, асосан, туяқуш гўшти ҳисобига бўлади. Бир йилда битта туяқушдан 30-40 тагача жўжа, 40-50 тагача тухум олиш мумкинлиги тажрибада исботланган.

Шунингдек, уларнинг 70 йилгача умр кўриши мутахассислар томонидан қузатилган. Катта ёшдаги туяқушнинг бўйи 2,7 метр, вазни 150 килограммдан ортиқ бўлади. Соатига 70 километргача югуради. Тухуми йирик, узунлиги 150 мм, оғирлиги 1,5-2 килограммгача бўлади. 3 ёшда вояга етади. Асосан, ўсимликлар, ҳашаротлар, майда умуртқали ҳайвонлар билан озикланади.

Сирасини айтганда, юртимизнинг бебаҳо табиати ҳамда тадбиркорларга яратилаётган қулай муҳит ноанъанавий ишбилармонлик тармоқларини очиш имконини ҳам бермоқда. Энг муҳими, ушбу тармоқлар аҳолининг даромади ошиши, янги иш ўринлари яратишга ҳисса қўшиши билан муҳим аҳамият касб этаётир.

Туяқушчилик билан шуғулланишнинг аҳамияти шундаки, дейди тадбиркор Фарангиз Азимова, — қушдай харажат билан туяқуш даромад олиш мумкин. Бу эса тармоқнинг истиқболлини белгилайдиган муҳим омилдир.

Ҳамиджон БУРҲОНОВ,
«Qishloq hayoti» муҳбири.

Жаҳонгир МИРЗАМАТОВ
олган суратлар.



Вилоятнинг Риштон туманида бу борада олиб борилаётган ишлар ҳам диққатга сазовордир. Бундан уч-тўрт йил бурун туманда туячиликни ривожлантиришга қўл урилган эди. Бу иш яхши самара бераётгани, одамлар туянинг шифобахш сүтидан баҳраманд бўлиб, турли касалликларга шифо топаётгани ҳақида газетамизда мақола ҳам босилганди. Буни қарангки, миллий кулолчиликнинг бешиги ҳисобланган Риштонда айни пайтда Африка туяқушларини парваришlashга ва уни ривожлантиришга қўл урилди. Бу борада катта иқтисодий самарага эришилмоқда. Ушбу ташаббус ҳақида вилоят бўйлаб хабарлар тарқалди. Туяқушларни томоша қилишга келаётганлар ҳам кўпайгандан кўпайди. Чунки илгари бу улкан қўшни фақатгина ҳайвонот боғларидагина кўриш имконияти мавжуд эди.

Биз яқинда Риштон шаҳрининг Боғистон маҳалласида истиқомат қилувчи хусусий тадбиркор Фарангиз Азимова билан суҳбатлашдик.

— Парранда етти хазинанинг бири, дейилганда туяқуш ҳам назарда тутилган бўлса керак, — дейди кулиб Фарангиз Азимова. — Биз Россия, Қозғистон, Украина каби давлатларда, шунингдек, кейинги йилларда ўзимизнинг Бухоро, Хоразм вилоятларида ҳам туяқуш боқишга алоҳида эътибор қаратилаётганини эшитгандик. Билишимизча, улар бугунги кунда нафақат Жанубий Африкада, балки дунёнинг бошқа ҳудудларида жойлашган 50 та мамлакатда боқилар экан. Истиқболли лойиҳани водий шароитида синаб кўришга аҳд қилдик ва қишлоғимизда «STRAUS FARM» Ўзбекистон — Буюк Британия қўшма корхонасини таш-

кил этдик. Қиймати 306 минг АҚШ долларини ташкил қилувчи лойиҳа ишлаб чиқилди ва унга кўра ферма жиҳозланди, инвестиция ва банк кредити ҳисобига 200 та Африка туяқуши олиб келинди.

Туяқушлар беозор экан, улар емиш танламаслиги билан ҳам ажралиб тураркан. Корхона ишчилари уларни бошқа қушлардан фарқли равишда алоҳида эътибор билан парваришlashяпти. Улар даставвал туяқушларни кенг далада яйратиб боқиш мақсадга мувофиқ эканлигини яхши англадилар. Ёпиқ бинода бу жониворлар яхши ўсмас экан. Босиси, ўзлари ўт, емиш қидиришни хўш кўраркан. Келажакда бу қушларни нафақат Риштон тумани, балки вилоят миқёсида кўпайтириш учун қизиқувчи тадбиркорлар таклиф қилиниб, туяқушлар келтирадиган иқти-

содий самара ҳақида тушунчалар берилди.

Туяқушнинг гўшти ҳам, тухуми ҳам фойдали ҳисобланади. Аҳоли саломатлигини мустаҳкамлашга, касалликларнинг олдини олишга, шунингдек, соғлом овқатланишни таъминлашга хизмат қилади. Унинг терисидан қимматбаҳо кийимлар, пойабзал, ҳамён, аёллар сумкаси, тирноғидан бриллиант ва олмосларни тозаловчи кукун, патидан эса пар ёстиқлар ҳам тайёрланади.

Риштонлик туяқуш боқувчилар бугунги кунда ўзларига ажратиб берилган 16 гектарга

Самарқанд Вилояти

ТОМОРҚА — ХАЗИНА

КИЧИК ЕРДАН КАТТА МАНФААТДОРЛИК

Самарқанд вилоятида томорқа ва деҳқон хўжаликларининг ерлардан самарали фойдаланиш, интенсив усулда ҳосилдорликни ошириш, озик-овқат маҳсулотлари етиштиришни кўпайтириш бўйича шарт-шароитлар таҳлил қилиниб, аҳоли даромадларини янада кўпайтириш чора-тадбирлари кўрилмоқда. Айни пайтда вилоят бўйича 557 мингдан ортиқ деҳқон хўжаликлари ва хонадон соҳибларига тегишли 88 минг гектар томорқа ер бўлиб, бу ердан қўшимча даромад олиш учун имконият беради.

Кам харажат қилиб кўпроқ моддий манфаатдорликка эришишда мақсад иссиқхоналарда кўкатлар, полиз маҳсулотлари ва цитрус мевалар етиштиришга қизиқиш ортмоқда. Бундай иссиқхоналарнинг қулайлиги шундаки, ердан 2-2,5 метр чуқурликда тупроқ чиқарилиб, экин майдони ҳосил қилинади ва устки қисми плёнка билан ёпилади. Бунинг учун 5-6 миллион сўм атрофида маблаг

сарфланади ва бу харажатлар икки-уч йил ичида тўлиқ қопланади. Иссиқхона ташкил этиб, меҳнати самарасини кўраётган кишилар бунинг фаолияти мисолида исботлашмоқда. Вилоятнинг Ургут туманидаги Деҳқонobod маҳалласида яшовчи тадбиркор Азамат Сайдуллаев ҳам шулар жумласидандир.

— Дастлаб, лимон етиштиришни бошлаган давримда бироз қийинчиликлар



бўлди, — дейди «Азамат-Муктабар олтин лимонлари» деҳқон хўжалиги раҳбари Азамат Сайдуллаев. — Қизиқишим устунлик қилиб фарзандларим билан биргаликда фаолиятимизни давом эт-

тирдик. Бора-бора ишларимиз ривожланиб кетди.

Азамат ака асли ўқитувчи оиласида вояга етгани учун иссиқхонада иш юритиш янгилик эди. Ҳозирда маҳалладошлари лимон етиштириш, оилавий тадбиркорликнинг сир-синаотларини Азамат акадан ўрганиб келяпти. Иссиқхона қилиш, цитрус мевалари етиштиришда тажриба тўплаб бораётган тадбиркор маҳалласи ва қўшни қишлоқларда шу йўналишда иш бошлашни истовчиларга амалий ёрдам кўрсатиб келмоқда. Қилинган меҳнат эвазига етиштирилаётган лимонларни сотувга чиқариш, маҳаллий бозорларни тўлдирish билан бирга, лимон кўчатларини аҳолига етказиб беришга киришди. Шу аснода тадбиркор оиласига келаётган даромадлар миқдори ҳам йилдан-йилга ортиб бораётир.

Нуриддин БОЛИЕВ,
«Qishloq hayoti» муҳбири.

ҚИШ ЧИЛЛАСИДА БАҲОР ҲАВОСИ БЎЛСА...

БУНДАЙ ШАРОИТДА ҒАЛЛАКОРЛАР НИМАЛАРГА ЭЪТИБОР ҚАРАТИШИ ЛОЗИМ?

Бу мавсум иқлими ғаллакорлар учун бироз нуқулай келмоқда. 2015 йил декабрь ойининг иккинчи ўн кунлиги ва 2016 йил январь ойларининг нисбатан илиқ келиши ғалла парваришида мураккаб вазиятни юзага келтирмоқда. Бу ҳолат ғаллакорлардан тадбиркорлик билан иш ташкил этишни тақозо қилмоқда. Боиси, қишнинг илиқ келиши натижасида бегона ўтлар уруғлари, касаллик споралари ва зараркунандаларнинг тухумлари тўлиқ ўлмайди. Эрта баҳорда бегона ўтлар, касаллик ва зараркунандалар кўпайиши хавфи ошади.

Яна бир ҳолат шундан иборатки, кузги бугдой уруғи мақбул муддатларда экилиб, майсалатиб олинганда, майсалар 60-65 кундан кўп вақт ичида қишки тиним даврини ўтказди. Бу йил қиш ойларининг ҳар йилгидан илиқ бўлиши ғалланинг биологик ривожланишини ўзгартирмоқда. Яъни ҳаво ҳарорати +3-5°C бўлганда ғалла қишки тиним даврига ўтади. Бироқ ҳозирги кузатилаётган об-ҳаво шароити майсанинг тиним даврига тўлиқ ўтиши учун шароит яратмапти. Майсалар тунда тиним даврида, кундузи эса ривожланиш босқичини ўтамоқда. Бу вазиятда ғаллани навлари, уруғ экилган муддат, уруғнинг униб чиққан ҳолати ва туплаш жараёнига қараб парвариш қилишни талаб этади.

БИРИНЧИ ҲОЛАТДА

Эрта муддатларда экилиб, ҳозирги кунда 7-8 та ва ундан ортиқ туплаган, бўйи 15-20 сантиметрга етган майсаларга ишлов бермаслик лозим. Бундай майдонларни қондириб суғормаслик ва ортиқча минерал ўғитлар билан озиклантирмаслик даркор. Чунки ғалла эрта экилганда эрта униб чиқади, ҳаво ҳарорати етарли бўлганлиги сабабли қишгача яхши туплаб, ҳатто найчалашга ҳам улгуради. Айни шу ҳолат, яъни найчалаш босқичида майсаларнинг туплаш бўғинидаги ҳужайралар таркибидаги шаккар миқдори камайиб, ўсимлик совуққа чидамсиз бўлиб қолади ва оқибатда қишдан ёмон чиқади.

Агарда озиклантириш, суғорилса, об-ҳаво илиқлиги шундай давом этса, февраль ойининг иккинчи 10 кунлигида кузатиладиган совуқларда майсаларнинг асосий бош поялари нобуд бўлиши мумкин. Қолаверса, бу йилги иқлим шароитида эрта баҳорда кўпайиши мумкин бўлган касаллик ва зараркунандалар ҳосилдорлик пасайиб кетишига таъсир этиши мумкин.

ИККИНЧИ ҲОЛАТДА

Майсалари 3-4 тадан ортиқ туплаган майдонларни тўлиқ суғориш лозим. 2 тадан туплаган ёки 3-4 баргли кечки майдонларни эса маҳаллий ўғит билан “шарбат” усулида суғориш керак.

Майсаларга “чилла суви” беришнинг афзалликлари ва фойдаси шундан иборатки, у ғаллазорларда мўътадил иқлимни сақлаб туради. Кундуз кунларидаги илиқ ҳавода ўсиб кетмаслигини таъминлайди. Туплаш бўғинини рағбатлантиради ва шаккар моддасини тўплашга ёрдам беради. Ўз навбатида, кейинчалик бўладиган совуқларга майсаларнинг чидамлилигини оширади.

УЧИНЧИ ҲОЛАТДА

Айрим сабаблар билан кеч экилган ғалла майдонларига камида гектарига 10 тоннадан гўнг чиқариб, “шарбат” усули билан суғориш муҳим тадбирлардан ҳисобланади. Кечки ғаллани “шарбат” билан суғориш илиқ ҳавода майсаларда туплаш жараёни тезлаштиради. Майсалар таркибида шаккар моддасининг кўпайишига омилкорлик қилади. Булар, ўз навбатида, баҳорги ривожланиш даврига қадар майсаларни қоқоқликдан чиқаришга ёрдам беради.

БУГУН ҲАМ, ЭРТАГА ҲАМ ФОЙДА БЕРАДИ

Шу ўринда айна вақтда берилган маҳаллий ўғитнинг фойдали хусусиятларини санаб ўтишни жоиз билдик. Бу тадбир майсалар учун энг зарур бўлган 30-40 сантиметр чуқурликдаги тупроқнинг намлигини сақлайди. Натижада тупроқда эримай қолган минерал ўғитлар эриб, ўсимлик ўзлаштирадиган ҳолатга келади. Бу бир марта ўғитлашда ҳам юқори самара беради.

Шўрланган ва шўрланишга мойил бўлган майдонлардаги шўрни тупроқ остига тушириб, майсаларнинг меъёрида ўсишини таъминлайди.

Бугунги кунда берилган маҳаллий ўғит тупроқнинг 30-40 сантиметр чуқурликдаги намлигини тўла таъминлайди. Айни шу ҳолат асосан май ойларида майсалар чанқашининг олдини олади. Ўша вақтда кечадиган бошоқлаш босқичида абдибон



натижа беради. Яъни бошоқларнинг тўқ ва доннинг сифатли бўлишига замин яратади.

ҒАЛЛА ПАРВАРИШИГА ҚАЧОНДАН КИРИШГАН МАЪҚУЛ?

Эрта экилган ғаллани об-ҳаво шароитига қараб, хусусан, жанубий минтақаларда (Сурхондарё, Қашқадарё вилоятлари) февраль ойининг биринчи 10 кунлигидан, ўрта минтақаларда иккинчи 10 кунлигидан ва шимолий минтақаларда (Қорақалпоғистон Республикаси ва Хоразм вилоятлари) 20-28 февралдан ғалла парваришига киришиш лозим.

Эрта баҳорги озиклантиришнинг тахминий муддати жанубий минтақаларда 1-10 февраль, ўрта минтақаларда 10-25 февраль ва шимолий минтақаларда 20-28 февралга тўғри келади. Бунда азотли ўғитларнинг йиллик меъёрини (180-210 килограмм соф ҳолда) таъсир этувчи модда ҳисобидан 25 фоиз бериш тавсия қилинади. (Физик ҳолда 150-160 кг. гектарига).

Азотли озиклантиришни, энг аввало, кеч муддатларда экилиб, қишловдан қийинчилик билан чиққан майдонларда, кейин

эса уруғлик этиштириш учун экилган майдонлар ва ниҳоят қолган майдонларда ўтказиш тавсия қилинади. Қишловга тупламасдан кирган ҳамда қишловдан қийинчилик билан чиққан майдонлардаги ўсимликларни кўшимча тартибда гектарига 100 килограмм (физик ҳолда) меъёрда озиклантириш яхши самара беради.

Бу тадбир кўчат қалинлигини барқарорлаштириш билан бирга ўсимликда тупланиш жараёнини жадаллаштиради. Бунинг натижасида бир квадрат метр майдонда ўртача 550-600 донагача маҳсулдор поя ҳосил қилишга эришиш мумкин.

Эрта баҳорги озиклантиришни ўз муддати ва меъёрида амалга ошириш ҳисобига бир гектар майдонга 4-6 центнергача кўшимча ҳосил олишга замин яратилади.

Озиклантиришда азотли ўғитлар меъёрини тўғри белгилаш ўсимликларда ўсиш жараёни бошланишида муҳим ўрин тутди. Агар ўсимликларда ўсиш жараёни кеч бошланса, бу даврга келиб ҳаво ҳарорати тез кўтарилади, ривожланиш босқичларини ўташ вақти ва озуқа моддаларини ўзлаштириши пасаяди. Шу боис, ўсимликда тупланиш ва генератив органлар

ривожланишини кучайтириш мақсадида азот меъёрини йиллик меъёрига нисбатан 25 фоиз эмас 30 фоизга оширилиши тавсия этилади. Меъёр бундан оширилганда эса майсалар уларни ўзлаштира олмайди. Натижада азотли ўғитларнинг ортиқча қисми сув ёки ёғингарчилик билан ювилиб кетиши мумкин.

Озиклантиришдан сўнг ҳар бир минтақада тупроқ намлиги ва иқлим шароитини ҳисобга олган ҳолда гектарига 700-800 куб метр сув таралади. Суғориш жараёнида кўшимча озиклантириш мақсадида жамғарилган маҳаллий ўғитларнинг 60-70 фоизи “шарбат” усулида оқизилиши ниҳоятда яхши самара беради.

Эрта баҳорда бугдой майсалари ривожланиши сушт бўлган майдонларга минерал ва маҳаллий ўғитлар берилиши ўсимликларни ривожланиш жараёни тезлаштиради.

Бу даврдаги озиклантириш навларнинг биологик хусусиятларини инобатга олган ҳолда эртапишарлигига (Чиллаки, Звезда, Кума, Андижон-4, Бобур, Фозгон), ўртапишарлигига (Крошка, Гром, Грация, Нота, Таня, Краснодарская-99, Андижон-2, Яксарт, Зимница, Сила, Дружба) ва ўрта кечпишарлигига (Восторг, Половчанка, Дўстлик, Андижон-1, Дурдона) алоҳида эътибор бериш керак. Чунки эртапишар навлар бошқа навларга нисбатан эрта найчалаш босқичига киради. Бу эса эртапишар навларни бошқа навларга нисбатан 7-10 кун эртароқ озиклантиришни талаб этади.

Агрономларнинг хулосаларига кўра, февраль ойининг охирида касаллик, зараркунанда ҳашаротлар ва бегона ўтлардан кучли зарарланган майдонларни аниқлаб чиқишга алоҳида эътибор бериш зарур.

Деҳқонлар таъбири билан айтганда, йил йилга ўхшамайди. Ҳар йилнинг ўзига хос хусусияти, об-ҳавонинг эса инжиқликлари бор. Бу йилги иқлим эса ғаллакорлардан кўп йиллик тажриба ва илмий хулосалардан келиб чиққан ҳолда ғалла парваришини ўтказиш лозимлигини кўрсатмоқда.

Равшанбек СИДДИҚОВ,
Дон ва дуккакли экинлар илмий-тадқиқот институти директори, қишлоқ ҳўжалик фанлари доктори.

ҲОЗИРГИ КУЗАТИЛАЁТГАН ИЛИҚ ҲАВО ҒАЛЛАКОРЛАР УЧУН БАЪЗИ ҚИШКИ ТАДБИРЛАРНИ ТЕЗРОҚ УДДАЛАШ ИМКОНИНИ БЕРАДИ:



● Суғориш тармоқларини ўз вақтида таъмирдан чиқариш.



● Ғалла майдонларида майсаларнинг ривожланиш ҳолатига қараб, ҳар гектар ерга камида 10-15 тоннадан маҳаллий ўғит чиқариш. Ҳар 5 гектар майдонга биттадан “шарбат” ўралар қовлаш.



● Ҳар бир ғалла экилган майдонларни алоҳида мониторингини ўтказиш.



● Чорва молларидан майсаларни ҳимоя қилиш учун ихота тўсиқларини ташкил этиш ҳамда мавсумда ишлатиладиган техникаларни соз ҳолатга келтириш.



● Бу йилги мураккаб об-ҳавони ҳисобга олиб, бегона ўтлар, касалликлар, зараркунандаларга қарши ишлов бериш учун гербицид, фунгицид ва инсектацидлар захирасини яратиш.



«САҲРО ГАНЖИНАСИ»

Яқинда Швейцарияда нашр этиладиган «Diva International Diplomat» журналининг навбатдаги сониди ана шундай сарлавҳа остидаги мақола босилиб чиқди. У журналхонларни жаҳондаги энг таниқли маданият масканларидан бири – мамлакатимизда жойлашган И.Савицкий номли давлат санъат музейи билан яқиндан таништирган.

Мақолада алоҳида таъкидланганидек, мазкур музей меъморий ва фольклор, халқ амалий санъати ҳамда Марказий Осиёнинг замонавий санъати экспонатларининг жуда катта мажмуиға эга.

«Британиянинг «The Guardian» газетаси уни дунёнинг энг нуфузли музейларидан бири, деб атади. Бугунги кунда бу ерда қарийб 90 минг асар жойлашган. Улар орасида графика ишлари, картиналар ва ҳайкалтарошлик асарлари, минглаб тарихий топилмалар, тўқимачилик ва заргарлик буюмлари, кўҳна Хоразм тамаддунидан тортиб то бугунги ўзбек ва қорақалпоқ рассомларининг ижодини акс эттирадиган асарларгача мавжуддир.

Мақолада Игор Савицкийнинг таржимаи холига ҳамда унинг илғор мўйқалам усталари томонидан яратилган ижодий ишларни асраб қолиш борасидаги саъй-ҳаракатларига алоҳида эътибор қаратилган.

«Соҳа мутахасссларининг қайд этишларича, бу коллекциядаги кашфиётлар воситасида санъат тарихини қайта ёзиш мумкин. Саҳро одамлари ва уларнинг маданиятидан илҳомланган И.Савицкий қорақалпоқ гиламларини, миллий кийимлар, қимматбаҳо заргарлик буюмлари ва бошқа санъат асарларини зўр иштиёқ билан йиғишни бошлаган. Айна пайтда у рассомларнинг Марказий Осиё билан боғлиқ асарлари ҳамда илғор рус мўйқалам усталари билан ҳам қизиқа бошлаган», деб ёзади журнал.

Журналнинг қайд этишича, И.Савицкий ёндашувидаги ўзига хос жиҳат шундаки, у нафақат энг сара асарларни, балки тажриба тариқасида яратилган ижод намуналарини ҳам жамлаган. «Бунинг натижасида мазкур музей бугунги кунда рассомларнинг индивидуал ривожланишини ҳамда ўша даврнинг илғор санъатини намойиш этмоқда», деб ёзади «Diva International Diplomat» журнали.

«Жаҳон» АА

Женева



Ўзбекистон Ёзувчилар уюшмаси аъзоси, ўнлаб китоблар муаллифи Хусанжон Аминов анчагина сермахсул ижодкор эди. Айниқса, у болалар учун жуда кўп ёзарди. Айна пайтда хушфەъл, дўст-биродарлар билан яхши кайфиятда ҳамсуҳбат бўлишни хуш кўрарди.

Хусанжон аканинг отаси Амин бобо отга жуда қизиқар, уни меҳр билан боқиб, абзалларига турли хил пўпақлар таққанча аравага кўшарди. Охири пайтлари фойтун арава ҳайдади. Шунинг учун бўлса керак уни «Амин карвон» деб ҳам аташарди.

Амин карвоннинг ўн тўрт фарзанди бор эди. Уларнинг кўпчилиги ёшлигидаёқ вафот этиб, Хусанжон ака ва битта опаси яшаб қолганди. Опаси ҳам уруш ва ундан кейинги давр қийинчиликлари ортидан вафот этиб кетди.

Амин карвон ҳам оламдан ўтгач, хотини ёлғиз ўғли Хусанни еру кўкка ишонмай катта қилди.

– Қишлоқда тенгдошлар билан эшакда далага сомон олиб келишга борардик, – дея эслайди шоирнинг қишлоқдоши Яраш

Нуруллаев. – Хусанжон кичик гавдали ва паст бўйли бўлиб, қопни сомонга тўлдиршида болалардан орқада қоларди. Биринчи бўлиб қопни тўлдирганлар унга ёрдам кўрсатишарди. Сомон тўлдирилган узун қопнинг ўртасидан тепиб чуқур қилинар, уни эшакка ортганда тарозининг икки палласидай яхши жойлашарди. Шундан сўнг қопнинг устига ўтириб олиб, уйга жунардик.

Онаси уни даладан қайтгунча йўлга чиқиб кутиб ўтирарди. Кечикаверсак, пиёда анча йўл босиб келиб кутиб оларди...

У шунча қийинчиликларга қарамай мактабда барча фанларни яхши ўзлаштириши баробарида, айниқса, адабиётга жуда қизиқарди. Урта маълумот тўғрисидаги аттестатни аълочи ўқувчисига топширган мактаб

МУБОРАК ҚАДАМЖОЛАРДАН СЎЗЛАЙДИ

Қадимги шаҳар ва қишлоқлар, қўрғонлар, қалъалар, истехкомлар, карвон йўлларининг излари, мақбаралар, қоятош тасвирлари, табиий чашма ва булоқли манзиллар ҳақидаги илмий адабиётлар ўлкамиз тарихини ўрганишда муҳим манба бўлиб хизмат қилади. Зеро, тарихий ёдгорликлар ўтмиш билан бугунни боғлаб турувчи бебаҳо ҳужжат ва далиллардир.

Айниқса, зиёратгоҳ ва қадамжолар тарихий хотиранинг моддий мероси сифатида миллий ва маънавий қадриятларни ўзида мужассам этган. Зиёратгоҳлар жойлашган қишлоқ ва шаҳарлар ҳамиша обод ва файзли бўлиб, довруғи узокларга тарқалган. Зиёратгоҳлар меъморлар, дизайнер ва санъаткорларга ижодий илҳом бағишлайди, янги ижод намуналарининг яратилишига туртки беради. Шунинг учун бу ҳақдаги китобларга қизиқиш ва талаб катта.

Мана шу йўналишда ҳуқуқшунос Бахтиёр Эралиев, тарих фанлари доктори Икромиддин Остонакулов ҳамда тарих фанлари номзоди Нодиржон Абдулаҳатовлар қаламига мансуб «Ўзбекистон зиёратгоҳлари ва қадамжолари» деб номланган 1-2-3-китобларининг ўқувчилар қўлига етиб бориши маданий ҳаётимизда қувонарли ҳодисадур.

Муаллифлар ўлкашунос, тарихчи ва маданиятшунос сифа-

тида республикаимиздаги барча зиёратгоҳлар ва қадамжоларни вилоят ва туманларга бўлган ҳолда ўрганишни мақсад қилишган. Ҳозиргача Фарғона, Андижон ва Наманган вилоятларидаги тарихий обидаларни ўрганиб, икки китоб ҳолида нашр этишга муяссар бўлишган.

Туркумнинг биринчи китобида Фарғона вилоятидаги 193 та зиёратгоҳ ва қадамжонинг таърифи ва таснифи берилган. Шунингдек, уларнинг пайдо бўлиш тарихи, тарихий шахсларнинг фазилатлари, эъзозланиш сабаблари, бу улғу инсонлар қолдирган маънавий мероснинг ҳаётимизда тутган ўрни кенг ёритилган.

Иккинчи китобда Андижон ва Наманган вилоятларидаги зиёратгоҳ мақомини олган 82 та тарихий обида ва меъморий ёдгорликнинг қурилиши, ўрганилиш тарихи, ижтимоий-маданий аҳамияти, шунингдек, зиёратгоҳларнинг номланиши, этимологияси, уларнинг вужудга

директори Жума Қодиров уни мактабда болалар етакчиси қилиб ишга қабул қилади. Меҳнат фаолиятини ўқувчи ёшлар билан ишлашдан бошлаган Хусанжон Аминов мунтазам ижод билан шуғулланади. Ёзган шеърлари, ўқувчилар ҳаётидан олинган мақолалари тез-тез туман газетасида босилади. Ўз ҳаёт даражасини ҳисобга олиб, Тошкент давлат университетининг журналистика факультетига сиртдан ўқишга кирди ва бутунлай ижод кишисига айланди.

Хусанжон Аминов турли идораларда турли лавозимларда ишлади, аммо ҳеч қачон қаламни четга суриб қўймади. 1983 йилдан қадрдон газетасига бош муҳаррир бўлиб, бу жойда йигирма йилдан кўпроқ меҳнат қилди.

Болалар учун ёзган шеърлари республика матбуотида мунтазам босилиб турди. Бора-бора у болалар шоири сифатида ном қозониб, ўнлаб китоблари чоп этилди. Хусан аканинг шеърлари кўплаб тadbирларда қайта-қайта ўқилар, улар асосида саҳна кўринишлари намойиш қилинарди.

Темирчида ўроқ бўлар,

«Икки»чида сўроқ бўлар.

Яхши ўқиб ўрганмасанг,

Баҳона ҳам «Қурок» бўлар.


Яхши ўзлаштирмовчи, ялқов ўқувчиларни танқид остига олувчи бу сингари шеърлар кўплаб ўқувчиларни аъло ўқишга ундагани ҳам бор гап.

Таниқли болалар шоири Қуддус Муҳаммадий ижодига меҳр қўйган Хусанжон Аминов вилоятда, пойтахтда кўплаб шоирлар, ёзувчилар билан ҳамкорлик қилиб, улар билан фикр алмашиб ижод қилди. Таниқли олимлар, санъаткорлар у киши билан суҳбатлашганларида қувониб кетишарди.

Хусан ака қишлоғини, Гузорни, унинг ажойиб одамларини жуда яхши кўрарди ва уларни олқишлаб жуда кўплаб шеърлар ёзганди. Тўю томошалар, байрамларда ҳар доим шоирдан шеър ўқишларини илтимос қилишарди. Унинг ёзган шеърлари таниқли хонандалар томонидан кўшиқ ҳам қилинган. Сўнгги йилларда насрда ҳам қалам тебратган Хусанжон Аминов «Армонли дунё», «Армонли гаплар», «Қисмат», «Қолганлар яшайверади» каби қатор асарларини ўқувчиларга тақдим этди. Бу китоблари орқали ижодкор одамларни яхшилик қилишга даъват қилди. Қилинган ҳар қандай гуноҳ иш ҳам жазосиз қолмаслигини ҳаётий мисолларда ўқувчиларга етказди.

Эътироф этганимиздек, Хусанжон Аминов ўта хушфەъл, хушчақчақ инсон эди. Гарчанд ҳаётдан кетганига анча йиллар бўлган эса-да, унинг ёзган асарлари, давраларда айтган ҳазиломуз гаплари, ўзи ҳақидаги хотиралар доим эсланиб туради.

Хусниддин НУРИДДИНОВ



келишига сабаб бўлган азиз инсонларнинг ҳаёти ва ижоди хусусида ҳикоя қилинади.

Учинчи китоб Тошкент вилояти ҳамда пойтахтимизда жойлашган зиёратгоҳлар, қадамжолар, улар билан боғлиқ азиз-авлиёлар, машҳур олимлар ва мутафаккирлар ҳаёти, ноёб фазилатлари тўғрисида ҳикоя қилади.

Айниқса, профессор А.Сандовнинг Зангиота зиёратгоҳ мажмуи тарихига оид «Ҳазрат Занги ота» номли китоби, профессор И.Ёрматовнинг қадимий зиёратгоҳ ва қадамжоларни ўрганиб ёзган қатор рисола ва монографиялари, муфтий У.Алимовнинг Ҳазрати Имом мажмуи

ҳақидаги асари ушбу тўпламни яратишда қимматли манба бўлиб хизмат қилган.

Китобларда зиёратгоҳлар суратлари ва жойлашган манзиллари хариталарининг илова қилиниши уларнинг илмий, маърифий, маънавий ва тарбиявий аҳамиятини янада оширган.

Мамлакатимизда амалга оширилаётган сиёсий, ижтимоий-иқтисодий ўзгаришлар, иқтисодий ютуқлар моҳиятини ўрганишда «Маданиятшунослик», «Тарих» ва унинг таркибий қисми бўлган «Тарихий ўлкашунослик» фанларининг ўзига хос ўрни ва аҳамияти бор. Ушбу курсларда Ўзбекистон халқларининг тарихий тараққиёти талабаларга моддий, этнографик, антропологик манбалар, архив материаллари, халқ оғзаки ижоди ва ёзма манбалар, шунингдек, бой маданий мерос асосида ўргатилади. «Ўзбекистон зиёратгоҳлари ва қадамжолари» туркумидаги учта китоб айна мана шу йўналишлар учун махсус ёзилган янги ўқув адабиётларидан бўлди, десак янглишмаймиз.

Наргиза МАДАМИНОВА,

Низомий номидаги Тошкент давлат педагогика университети ўқитувчиси,


Дилшода НАЗАРОВА,

Яшнобод туманидаги 226-умумтаълим мактаби ўқитувчиси.

БИЛАСИЗМИ?

ПОЙАБЗАЛНИ ҚАНДАЙ САҚЛАГАН АФЗАЛ?

Оёқ кийимнинг узоқ вақт хизмат қилиши учун, албатта, унинг сифати муҳим аҳамиятга эга. Аммо пойабзални эътибор билан кийиш, фойдаланмаган вақтда сақлай олиш ҳам унинг сифатига ўзига хос таъсир кўрсатади.



НИМА ҚИЛМАСЛИК КЕРАК?

Табиий чармдан тайёрланган оёқ кийимни ҳар куни қуруқ мато билан артиш лозим. Агар у лойга беланган бўлса, сув билан ювиш керак. Пойабзал тўлиқ қуригач, юзига крем суртилади. Крем яхши сингиши ва пойабзалда ёриқлар пайдо бўлмаслиги учун тозалаш ишларини кийишдан бир кун аввал бажарган маъқул. Қишки мавсумда пойабзал учун таркибида мум бўлган крем харид қилиш фойдалидир. Чунки мум чармин юмшатади ва сувни ўтказмайди. Ҳафтада бир марта пойабзалга махсус сув ўтказ-

майдиган спрей билан ишлов бериш унинг узоқ вақт хизмат қилишини таъминлайди. Локланган пойабзални доимо нам мато билан артиб туриш керак. Агар лой ёпишган бўлса, уни спирт билан тозалаш лозим. Ҳафтада бир марта таркибида ланолин ёки глицерин бўлган крем билан артиш зарур. Оёқ кийимнинг локланган юзаси ёрилмайди ва ялтираб туради. Сунъий чармдан тайёрланган оёқ кийимини ҳам ҳар куни нам мато билан артиш зарур. Ёгин-сочинли кунларда эса кремлаб кийиш лозим. Бунда асло

чарм пойабзаллар учун мўлжалланган кремдан фойдаланиш мумкин эмас. Негаки, унинг таркибидаги мум пойабзалга сингиш ўрнига юпка қатлам ҳосил қилиб, лойни ўзига тортади. Майин чарм (замш)дан қилинган қора ва жигарранг пойабзалларни нам латта билан артиш, бошқа ранглиларини эса кимёвий тозалашга бериш тавсия этилади. Бундай пойабзалларни махсус чўтка билан тозалаш керак. Намгарчилик вақтида махсус сув ўтказмайдиغان спрей билан ишлов бериш лозим.

Кўпчилик болалар креми пойабзал учун энг яхши химоя деб ўйлайди. Аслида эса у оёқ кийим юзасида юпка мойли қатлам ҳосил қилиб, чанг ва лойни ўзига тортади. Бундан ташқари, болалар кремидан фойдаланилганда чарм жуда ёғли бўлиб кетади. Оёқ кийимни асло иситиш мосламаси усти ёки ёнида қуришиб бўлмайди. Чарм тортилиб, пойабзал кичрайиб қолиши мумкин. Уни қуришти учун ичига қоғоз тиқиш, сўнгра иситиш мосламасидан 30 сантиметр узоқликка қўйиш керак. Доимий равишда махсус чўтка – губкадан фойдаланиш мумкин эмас. Унинг таркибидаги силикон пойабзалнинг тез емирилишига сабаб бўлади. Айтмоқчи бўлган фикримиз шуки, ҳар бир буюмни ўзига хос сақлаш қоидалари бор. Агар уларга амал қилинса, буюм узоқ вақт сифатли хизмат қилади.

Латофат БҮРИЕВА тайёрлади.

ЭЪЛОНЛАР

— БАРЧА ТУРДАГИ ҚУРИЛИШ ТАШКИЛОТЛАРИ ДИҚҚАТИГА! —

ЖИЗЗАХ ВИЛОЯТИ ҲОКИМЛИГИ «ЯГОНА БУЮРТМАЧИ ХИЗМАТИ» ИНЖИНИРИНГ КОМПАНИЯСИ 2016 ЙИЛ МАНЗИЛЛИ ДАСТУРИГА КИРИТИЛГАН ҚУЙИДАГИ ОБЪЕКТЛАР БЎЙИЧА ТАНЛОВ САВДОЛАРИ ЎТКАЗИЛИШИНИ ЭЪЛОН ҚИЛАДИ

ЛОТ № 12:

Лот № 12-1. «Жиззах вилояти Мирзачўл тумани «Ғалаба» МФЙда ичимлик суви тармоғи қурилиши».

Бошланғич қиймати: ҚҚСсиз 153,660 млн. сўм, ҚҚС билан 184,392 млн.сўм. Ишларни тугаллаш муддати – 2016 йил 20 июнгача.

Лот № 12-2. «Жиззах тумани «Қангли» ҚФЙ Аришли аҳоли пунктида ичимлик суви тармоғи қурилиши».

Бошланғич қиймати: ҚҚСсиз 328,064 млн. сўм, ҚҚС билан 393,677 млн.сўм. Ишларни тугаллаш муддати – 2016 йил 30 июнгача.

Лот № 12-3. «Жиззах вилояти Янгиобод тумани «Ховос» ҚФЙ «Янгиобод» МФЙда ичимлик суви тармоғи қурилиши».

Бошланғич қиймати: ҚҚСсиз 167,566 млн. сўм, ҚҚС билан 201,079 млн.сўм. Ишларни тугаллаш муддати – 2016 йил 20 июнгача.

Лот № 12-4. «Жиззах вилояти Янгиобод тумани «Сармич» ҚФЙ Юқори Сармич аҳоли пунктида ичимлик суви тармоғи қурилиши».

Бошланғич қиймати: ҚҚСсиз 242,432 млн. сўм, ҚҚС билан 290,918 млн.сўм. Ишларни тугаллаш муддати – 2016 йил 30 июнгача.

Лот № 12-5. «Жиззах вилояти Янгиобод тумани «Совот» ҚФЙ Оқтом аҳоли пунктида ичимлик суви тармоғи реконструкцияси».

Бошланғич қиймати: ҚҚСсиз 117,988 млн. сўм, ҚҚС билан 141,586 млн.сўм. Ишларни тугаллаш муддати – 2016 йил 10 июнгача.

ЛОТ № 13:

Лот № 13-1. «Жиззах вилояти Дўстлик тумани «А.Навоий» ҚФЙда ичимлик суви тармоғи реконструкцияси».

Бошланғич қиймати: ҚҚСсиз 149,795 млн. сўм, ҚҚС билан 179,754 млн.сўм. Ишларни тугаллаш муддати – 2016 йил 20 июнгача.

Лот № 13-2. «Жиззах вилояти Пахтакор тумани «Самарқанд» ҚФЙ Қорамирза аҳоли пунктида сув тармоғи қурилиши».

Бошланғич қиймати: ҚҚСсиз 144,633 млн. сўм, ҚҚС билан 173,560 млн.сўм. Ишларни тугаллаш муддати – 2016 йил 20 июнгача.

Лот № 13-3. «Жиззах вилояти Жиззах тумани «Гандумтош» МФЙда ичимлик суви тармоғи қурилиши».

Бошланғич қиймати: ҚҚСсиз 278,639 млн. сўм, ҚҚС билан 334,367 млн.сўм. Ишларни тугаллаш муддати – 2016 йил 30 июнгача.

Лот № 13-4. «Жиззах вилояти Зарбдор тумани «Оқбулоқ» ҚФЙда сув тармоғи қурилиши».

Бошланғич қиймати: ҚҚСсиз 212,137 млн. сўм, ҚҚС билан 254,565 млн.сўм. Ишларни тугаллаш муддати – 2016 йил 30 июнгача.

Лот № 13-5. «Жиззах вилояти Жиззах тумани «Қуёвбоши» ҚФЙда ичимлик суви тармоғи қурилиши».

Бошланғич қиймати: ҚҚСсиз 289,741 млн. сўм, ҚҚС билан 347,689 млн.сўм. Ишларни тугаллаш муддати – 2016 йил 30 июнгача.

ЛОТ № 14:

Лот № 14-1. «Жиззах тумани «Тоқчилик» ҚФЙда «Яккақайрағоч» МФЙда ичимлик суви тармоғи қурилиши».

Бошланғич қиймати: ҚҚСсиз 318,477 млн. сўм, ҚҚС билан 382,173 млн.сўм. Ишларни тугаллаш муддати – 2016 йил 30 июнгача.

Лот № 14-2. «Жиззах вилояти Зомин тумани «Ғаллакор» ҚФЙда ичимлик суви тармоғи қурилиши».

Бошланғич қиймати: ҚҚСсиз 308,809 млн. сўм, ҚҚС билан 370,571 млн.сўм. Ишларни тугаллаш муддати – 2016 йил 30 июнгача.

Лот № 14-3. «Жиззах вилояти Зомин тумани «Навбахор» МФЙда ичимлик суви тармоғи қурилиши».

Бошланғич қиймати: ҚҚСсиз 188,536 млн. сўм, ҚҚС билан 226,243 млн.сўм. Ишларни тугаллаш муддати – 2016 йил 20 июнгача.

Лот № 14-4. «Жиззах вилояти Фориш тумани «Михин» ҚФЙда ичимлик суви тармоғи реконструкцияси».

Бошланғич қиймати: ҚҚСсиз 347,186 млн. сўм, ҚҚС билан 416,623 млн.сўм. Ишларни тугаллаш муддати – 2016 йил 30 июнгача.

Лот № 14-5. «Жиззах вилояти Ғаллаорол тумани «Маданият» ҚФЙ Заргар аҳоли пунктида ичимлик суви тармоғи қурилиши».

Бошланғич қиймати: ҚҚСсиз 169,959 млн. сўм, ҚҚС билан 203,951 млн.сўм. Ишларни тугаллаш муддати – 2016 йил 30 июнгача.

Молиялаштириш Давлат бюджетни маблағлари ҳисобидан амалга оширилади.

Буюртмачининг манзили: Жиззах шаҳри Ш.Рашидов кўчаси 100-уй. Телефон: (0-372) 222-46-40, 222-26-41.

Ўзбекистон Республикаси Президентининг 2011 йил 7 февралдаги ПҚ-1475-сонли ва Ўзбекистон Республикаси Вазирлар Маҳкамасининг 2011 йил 1 апрелдаги 100-сонли қарорларига асосан бошланғич қиймати 500 млн. сўмгача бўлган объектлар бўйича танлов савдолари фақат кичик бизнес субъектлари ўртасида ўтказилади.

Марказлаштирилган капитал қўйилмалар ҳисобига молиялаштириладиган ушбу объектларда қурилиш-монтаж ишларини бажариш бўйича танлов савдоларида фақат Қурилиш-пудрат ташкилотлари реестрига киритилган ташкилотлар иштирок этишларига рухсат берилди.

Танлов савдоларида иштирок этадиган ташкилотлар қуйидаги шартларга жавоб беришлари керак:

танлов савдоси предметининг 20 фоиз миқдоридеги айланма маблағларига ёки кўрсатиб ўтилган маблағларни бе-

ришга банк кафолатномасига, ишлаб чиқариш базалари, ишларни бажариш учун зарур бўлган меҳнат ресурслари ва мутахассисларга, етарли касбий ва техникавий малакага, молиявий имкониятларга, шартнома тузиш юзасидан фуқаролик-муомала ҳуқуқий лаёқат ва ваколатларига эга, ўхшаш иншоотларни қуриш бўйича тажрибали ва ишончли бўлишлари шарт.

Танлов савдосида маҳаллий ва чет эл қурилиш ташкилотлари иштирок этганда уларнинг танлов таклифлари баҳоланаётганда маҳаллий пудратчилар учун қуйидаги нарх преференциялари кўзда тутилган:

оферентларнинг танлов таклифларини баҳолаш вақтида қонунчиликка мувофиқ қўшимча қиймат солиғини тўлашдан озод этилган импорт ишларни бажарувчи ва хизмат кўрсатувчи чет эл оферентларнинг таклифларига қўшимча қиймат солиғи қўшиб ҳисобланади.

Танлов савдосида қатнашиш ва танлов ҳужжатларини олиш учун сўровнома билан танлов савдоси ташкилотчиси – Жиззах вилояти қурилишда танлов савдолари ва нархларни шакллантириш ҳудудий консалтинг марказига қуйидаги манзилга мурожаат этиш мумкин: Жиззах шаҳри Х.Дўстлиги шоҳкўчаси Medstar клиникаси ёнидаги бино. Тел/факс: 226-14-66.

Бир тўплам танлов ҳужжатларининг нархи – 100 000 сўм.

Таклифлар (офёрталар) танлов савдоси ташкилотчиси томонидан юқоридаги манзилда қабул қилинади.

Офёрталарни танлов савдоси ташкилотчисига тақдим этишнинг охириги муддати – офёрталар очилиши кунини ва соати гача.

Танлов савдоси эълон матбуотда чоп этилганидан 30 кундан кейин қуйидаги манзилда ўтказилади: Жиззах шаҳри Халқлар Дўстлиги шоҳкўчаси, Жиззах вилояти қурилишда танлов савдолари ва нархларни шакллантириш ҳудудий консалтинг маркази мажлислар зали.

Table with 3 columns containing lot details, company information, and contact details for the tender process.

ОДАМЛАР ҚАЛБИГА ҚУВОНЧ, ОИЛА ДАРОМАДИГА БАРАКА

Сурхондарёлик танишимиз Шухрат аканикига меҳмонга бордик. Ховлидаги, хоналардаги гулларни кўриб баҳри дилингиз очилади. Тувакдаги барқ уриб, яшнаб ўсаётган ноёб гулларни қандай кўпайтиргани билан қизиқдик. Шунда у киши буларнинг ҳаммасини Денов туманидаги дўсти Зокир Хўжамқуловдан олганини, унинг гуллари нафақат Сурхондарёда, балки бошқа вилоятларда ҳам харидорлигини айтди.

Зокир Хўжамқулов ака-укалари билан биргаликда ноёб ва маҳаллий гул кўчатларининг 400дан ортиқ турини парваришлар экан. Аввалига шунчаки қизиқишдан бошланган фаолият бора-бора яхшигина даромад манбаига айланибди. У кишининг гулхонасига кирарканмиз, гулларнинг муаттар ифори димоққа урилади. Гўзалликдан хайратга тушасиз. Атрофга назар ташлаб, бир дона гулнинг илдиз отиб, авж олиши қанчалик машаққатли меҳнатни талаб этишини ҳис қиласиз. Айниқса, алоҳида эътибор ва парвариш талаб қиладиган хона гуллари ўстириш ҳаммаининг ҳам қўлидан келавермайди.

– Хонадонларда гул парвариш қилмоқчи бўлган киши, аввало, унинг қандай шароитда ўсганидан хабардор бўлиши керак, – дейди З.Хўжамқулов. – Бунинг учун унинг қаердан келтирилганини — ватанини билиш лозим. Шу сабабли, харидорларга олаётган гуллари қандай парваришлар кераклигини айтаемиз. Хонаки гулларни ўстиришда сўғоришни билиш катта аҳамиятга эга. Уларни иссиқ-совуққа чидамли-чидамсиз эканига қараб маълум ажратилган хоналарга жойлаштирилади, гулнинг табиатига мувофиқ келадиган тупроқли аралашмалар тайёрланади, зарур ўғитлар солинади. Қисқаси, ҳар қандай ниҳолга меҳр, эътибор берсангизгина, у гуллаб-яшнайд.

Дастлаб кичкинагина томорқада маҳаллий гул кўчатларининг 4-5 турини етиштирган Зокиржон хозирда 50 сотих ерда гулчилик билан шуғулланиб, йилига 10-15 миллион сўмгача даромад оляпти. Шунинг орқасидан енгил машинали бўлди. У гул



етиштиришнинг сир-асрорларидан яхшигина хабардор бўлибгина қолмай, уларнинг фойдали хусусиятларини ҳам яхши билар экан.



МУТАХАССИС ТАВСИЯ ЭТАДИ:

● Гулнинг пастки барглари қуриши ва тўкилиши ёруғлик етишмаслиги ёки ҳавонинг ўта юқори ҳароратлиги, етарлича сўғормаслик оқибатида рўй беради.

● Гул ғунчасининг тўкилишига ҳавонинг қуруқлиги, кам сўғориш, тувак жойини тез-тез алмаштириш, азот етишмаслиги ва зараркундалар сабаб бўлади.

● Гуллари тез сўлиб қолса, бу ўсимликнинг ўғитга муҳтожлиги, қуёш нури, хона ҳавосида намлик етишмаётганлиги ёки ҳаддан ортиқ иссиқ ҳарорат белгиси.

● Гул барглари учи сарғайиши – калций етишмаслиги, етарлича сўғормаслик оқибати.

● Сопол тувак юзасида яшил қоғлам пайдо бўлса, билинг-ки, сувни кўп қуйгансиз.

Гуллар уй ҳавосини тозаловчи вазифасини бажариш билан бирга киши руҳиятига ижобий таъсир кўрсатиш хусусиятига эга. Ахир ташқарида ёмғир, қор ёғиб турганида хонада яшнаб турган гуллар киши баҳри дилини очади-да. Олимларнинг айтишича, кўпгина хонаки гул ва ўсимликлар хона микроклимига ижобий таъсир кўрсатар экан. Уларда хона шароитида тез кўпаядиган зарарли микро-организмларни ўлдирувчи хусусият мавжуд. Яқинда тадқиқотчилар хона ўсимликларининг яна бир фойдали жиҳатини аниқлашди. Яъни тувакдаги гуллар кўпгина касалликларнинг олдини олиш билан бирга, электр жиҳозлар (сканер, компьютер, принтер ва бошқалар)нинг инсон организмга салбий таъсирини анча камайтира экан. Бунинг учун ўртача катталиқдаги хонага 3 та хона гули кифоя қилар экан. Масалан, кактус, семизўт, каланхоэ кабилар ана шундай хусусиятга эга. Дифенбахия гули ўзидан ажойиб ҳид таратади, хонада бўлган вақтда ҳавони тозалайди.

Ярим гектар ернинг 25 сотихида иссиқхона ташкил қилган З.Хўжамқулов шаҳар ободончилигига озми-кўпми ўз хиссасини қўшмоқда. У офислар, мактаб, коллеж, лицейлар учун ҳам гул етиштириб берапти. Қолаверса, маҳалладошларидан ҳам харидорлари кўп. Келгусида иссиқхоналарини янада кенгайтириб, хориждан янги гул навларини келтириб, маҳаллийлаштириш ниятида.

Муқаддас БОБОМУҲАММЕДОВА

ШИФОБАХШ НЕЪМАТЛАР

Айни киш палласида танамизга қувват бағишлайдиган табиат неъматлари ва дармондорига бой таомларни истеъмол этиш, иммунитетни мустаҳкамлаб, организмнинг турли касалликларга чалиниш хавфини камайтиради.

ҲАР ДОНАСИ ДАРМОН



Нўхат тўйимлилиги, қувватбахшлиги билан гўшга яқин турадиган шифобахш неъматлардан бири. У дуккақдошлар оиласига мансуб бир ва кўп йиллик ўсимлик бўлиб, ҳозиргача фандида 27 тури қайд қилинган.

Халқ табиотида унинг кўк донлари хомлигача ва қайнатилган ҳолда, шунингдек, гиёҳи ва пўстидан тайёрланган дамлама бўйрак-тош касаллигида пешоб ҳайдайдиган восита сифатида ишлатилади. Ундан турфа кўринишга эга бўлган тўйимли ва тансиқ таомлар тайёрланади. Нўхат ундан нон ҳам ёпилади.

Таобатда овқат ҳазм қилиш аъзолари фаолиятини маромга келтириш учун қовурилган нўхат донларини истеъмол этиш тавсия этилади. Унинг қайнатмаси сариқ касаллигида ижобий таъсир кўрсатади, жигар ва талоқда битиб қолган йўлларни очади. Дамламаси овозни равланштиради, терининг рангини яхшилайдди, тиш оғригини тўхтатади.

Манбаларда қайд этилишича, нўхат мойи темирлаткага, уни эса хавфли ўсма ва саратонга даво бўлади. Шу билан бирга, қонни тозалаб, иштаҳанинг очилишига туртки беради. Бу каби хусусиятлар унинг таркибида жо бўлган шифобахш моддалар кўплиги билан изоҳланади.

Етилган нўхат донида оксил, аминокислоталар, липидлар, қанд, твит ва пектин мавжуд. Дармондорилардан В гуруҳи, Е витамини бор. Таркибида маданий унсурлардан калий, калций, кремний, магний, олтингурут, фосфор, алюминий, бўр, темир, молибден, селен, руҳларнинг жамламаси бор.

Шулардан кўришиб турибдики, нўхат ҳаётбахш моддалар хазинасига эга. Ундаги селен моддаси антиоксидант хислатга эга бўлиб, баъзи хавфли ўсмаларнинг пайдо бўлишига йўл қўймайди.

Маннон НАБИЕВ

Махсулотлар сертификатланган
Хизматлар лицензияланган

АГРОТЕХНИКА

ТЕХНИКАНИ ЛИЗИНГА БЕРАМИЗ

- Беларус 80X ~ Беларус 82.1
- Беларус 1025 ~ Беларус 1221.1
- Боғ ва ферма учун тракторлар
- Картошка терадиган комбайн
- Ғўзапоя ўрайдиган комбайн
- Ўт ўрайдиган комбайн
- Дори сепадиган мосламалар
- Сомон йиғувчи мосламалар
- Сачратиб сўғорувчи мосламалар

- Культиваторлар
- Плуг, айланма плуг, дискали плуг
- Экскаватор погрузчик, бульдозер
- Канавокапатель, ямобур
- Аккумулятор, генератор
- Фильтр, мотор мойлари
- Сут соғадиган аппарат
- Мини тегирмон
- Ем майдалаб тарқатувчи техника

- Минерал ўғит ва кимёвий моддалар
- Прессподборщик
- Мотоблок
- Чизель
- Борона
- Косилка КИР 1,5
- Картошка экадиган комбайн
- Бугдой экадиган сеялка
- Пахта экадиган сеялка



РЕКЛАМА



(+99871) 280-00-71
(+99871) 280-00-72
sales@promzona.uz
www.promzona.uz

Бош муҳаррир:
Чори ЛАТИПОВ

МУАССИСЛАР:

Ўзбекистон Республикаси
Вазирлар Маҳкамаси
Агротехника комплекси
таркибидаги ҳамда шу
тармоққа дахлдор
вазирлик ва идоралар.

ТАҲРИР ҲАЙЪАТИ:

Шухрат ТЕШАЕВ, Улугбек УЗОҚОВ,
Содиқжон ТУРДИЕВ, Омонулло ЮНУСОВ,
Яшин ХИДИРОВ, Эркин ҚУДРАТОВ,
Фарход ОМОНОВ, Абдиқабил ТАМИКАЕВ,
Ботир СУЛАЙМОНОВ, Маҳмуд ТОИР,
Ҳабиб ТЕМИРОВ (Бош муҳаррир
Уринбосари), Анвар ҚУЛМУРОДОВ (Бош
муҳаррир Уринбосари), Муҳиддин
АБДУСАМАТОВ (Масъул котиб).

ТЕЛЕФОНЛАР:

Қабулхона — 236-26-50, Котибият — 233-95-17, Аграр масалалари бўлими — 233-76-78, Иқтисодий-сиёсий ва ҳуқуқий масалалар бўлими — 236-26-49, Маънавият ва маърифат бўлими — 236-26-35, Хатлар ва жамоатчилик билан алоқалар бўлими — 233-44-43, Факс — 233-44-43, 233-09-93.

ХУДУДЛАРДАГИ МУҲБИРЛАР:

Қорақалпоғистон Республикаси — (+99890) 592-62-04; Андижон — (+99893) 630-73-03; Бухоро — (+99891) 401-29-59; Жиззах — (+99893) 940-00-27; Навоий — (+99894) 374-77-62; Наманган — (+99893) 948-53-86; Фарғона — (+99890) 407-76-03; Самарқанд — (+99893) 994-57-08; Сирдарё — (+99894) 168-23-60; Сурхондарё — (+99890) 519-86-50; Тошкент — (+99890) 976-39-58; Хоразм — (+99890) 438-71-25; Қашқадарё — (+99891) 635-08-03.

Реклама
ва
эълонлар:

236-26-50,
233-28-04.



Ўзбекистон Матбуот ва
ахборот агентлиги
томонидан 2009 йил 13
февралда № 0020-ракам
билан рўйхатдан ўтказилган.

Навбатчи
муҳаррир:

О.ОЧИЛОВ

Мусахҳих:

М.БОБОМУҲАММЕДОВА

Дизайнер:

Н.ТЕМИРОВ

Газета сешанба, пайшанба,
шанба кунлари чиқади.
Буюртма Г-119,
ҳажми 2 босма табоқ.

Офсет усулида
босилди, қоғоз
бичими А-3.

Манзилимиз:
100000, Тошкент,
Матбуотчилар
кўчаси, 32-уй.

E-mail:
info@qishloqhayoti.uz

Босишга топшириш вақти: 21.00
Босишга топширилди: 21.20
23339 нусхада чоп этилди. Нашр индекси — 144

Газета таҳририятнинг
ўзида компьютерда
терилди ва
саҳифаланди.

“Шарқ” нашриёт-матбаа
акциядорлик компанияси
босмахонасида босилди.
Манзили: “Буюк Турон” кўчаси, 41-уй.

1 2 3 4 5